



KENYATAAN MEDIA

PERBINCANGAN STRATEGIK ANTARA **KEMENTERIAN PERTANIAN DAN INDUSTRI ASAS TANI (MOA)** **DAN KEMENTERIAN HAL EHWAL EKONOMI (MEA)**

1. Hari ini, kedua-dua kementerian telah berbincang untuk menentukan masa depan sektor pertanian negara. Ini merupakan satu hala tuju baharu, di mana kementerian-kementerian tidak bergerak secara bersendirian tetapi sebagai satu pasukan dalam merangka pendekatan yang baru untuk mereformasikan sektor pertanian negara.
2. Perbincangan strategik ini adalah susulan daripada pembentangan Kertas Putih “Ke Arah Kelestarian Lembaga Kemajuan Tanah Persekutuan (FELDA)” di Dewan Rakyat pada 10 April yang lalu yang telah membuka ruang untuk memperkenalkan tanaman-tanaman baharu yang mampu memberi hasil dalam tempoh yang singkat dan melalui proses agregasi, mencapai ekonomi bidangan.
3. Untuk mencapai matlamat ini, Kerajaan Pakatan Harapan telah bersetuju untuk memperuntukkan sejumlah RM1 bilion bagi Program Hasil Baharu yang akan dilaksanakan dalam tempoh 4 tahun, dari 2019 sehingga 2022.
4. MEA dan MOA mempunyai peranan penting dalam meningkatkan produktiviti dan mengenal pasti hasil pertanian yang berpotensi untuk meletakkan sektor pertanian sebagai pemacu ekonomi negara.
5. Kedua-dua Kementerian serta agensi-agensi berkaitan komited untuk menggembung sumber dan kepakaran sedia ada secara optimum ke arah mentransformasikan sektor pertanian. Setiap Kementerian akan menyumbang kekuatan bidang masing-masing untuk mencapai matlamat ini.

6. Agensi-agensi bawah MEA seperti FELDA, FELCRA Berhad dan Pihak Berkuasa Kemajuan Pekebun Kecil Perusahaan Getah (RISDA) memiliki *land bank* yang luas dalam pembangunan sektor pertanian yang mampu mencapai ekonomi bidangan dan meningkatkan jaminan bekalan makanan negara.
7. Di samping itu, penglibatan jabatan dan agensi MOA, antaranya Jabatan Pertanian (DOA), Jabatan Perikanan (DOF), Jabatan Perkhidmatan Veterinar (DVS), Lembaga Pemasaran Pertanian Persekutuan (FAMA) dan Lembaga Pertubuhan Peladang (LPP) dalam menyediakan khidmat nasihat teknikal dan pemasaran juga dapat memastikan usaha ini mencapai matlamatnya.
8. Kerjasama MEA dan MOA merupakan langkah pertama dalam membina sinergi antara kementerian agar tidak berlaku pertindihan fungsi dan pembaziran sumber. Sebagai contoh, kepakaran penyelidikan yang ada di Institut Penyelidikan dan Kemajuan Pertanian Malaysia (MARDI) boleh menjadi panduan kepada penentuan tanaman-tanaman baharu yang dapat mengeluarkan hasil yang tinggi dalam jangka masa yang lebih singkat.
9. Perbincangan hari ini juga meneroka potensi teknologi baharu era Revolusi Industri 4.0 seperti *artificial intelligence*, analisis *Big Data*, dron dan *Internet of Things* (IoT) dalam meningkatkan produktiviti sektor pertanian.
10. Kejayaan sinergi ini bakal memberi manfaat kepada semua pemegang taruh sektor pertanian, termasuk pengguna, apabila hasil tanaman dan ternakan berkualiti tinggi memperoleh harga yang berpatutan, memenuhi keperluan pasaran serta menjana pendapatan yang lebih tinggi kepada golongan petani, peneroka dan pekebun kecil.

**YB DATO' SERI MOHAMED AZMIN ALI
MENTERI HAL EHWAL EKONOMI**

**YB DATO' SALAHUDDIN AYUB
MENTERI PERTANIAN DAN INDUSTRI ASAS TANI**

3 MEI 2019